

(„Službeni glasnik BiH“, broj: 13/07)

Na osnovu člana 29. stav 3. Zakona o osnovama sigurnosti saobraćaja na putevima ("Službeni glasnik BiH", broj 6/06), ministar komunikacija i prometa, u suradnji sa ministrom civilnih poslova, donosi

PRAVILNIK

O NAČINU OBILJEŽAVANJA VOZILA KOJIM UPRAVLJA OSOBA S OŠTEĆENIM EKSTREMITETIMA

Član 1.

(Predmet Pravilnika)

Ovim Pravilnikom se uređuju uvjeti za dobivanje znaka kojim se obilježava vozilo kojim upravlja osoba s oštećenim ekstremitetima (u daljnjem tekstu: znak pristupačnosti), njegovo značenje, važenje i način korištenja, izdavanje, oblik, sadržaj, boja i dimenzije, način isticanja, te način obilježavanja parkirališnog mjesta za vozila kojim upravljaju osobe s oštećenim ekstremitetima.

Član 2.

(Uvjeti za dobijanje znaka pristupačnosti)

Znak pristupačnosti može dobiti osoba s oštećenim ekstremitetima, čiji su ekstremiteti, bitni za upravljanje vozilom, oštećeni najmanje 60 posto (u daljnjem tekstu: osoba s invaliditetom).

Član 3.

(Značenje znaka pristupačnosti)

Znak pristupačnosti omogućava parkiranje vozila kojim upravlja osoba s invaliditetom na parkirališna mjesta koja su u tu svrhu posebno obilježena.

Član 4.

(Važenje i upotreba znaka pristupačnosti)

- (1) Znak pristupačnosti važi samo kad vozilom upravlja osoba s invaliditetom.
- (2) Znak pristupačnosti ne može koristiti osoba koja nije osoba s invaliditetom.

Član 5.

(Međunarodni znak invalida)

Vozilo kojim upravlja osoba s invaliditetom, može biti obilježeno međunarodnim znakom invalida. Pravo na rezervirano parkirno mjesto se može koristiti samo uz znak pristupačnosti.

Član 6.

(Izdavanje znaka pristupačnosti)

- (1) Znak pristupačnosti izdaje tijelo nadležno za registraciju vozila (u daljnjem tekstu: nadležno tijelo).

(2) Osoba sa invaliditetom podnosi zahtjev za izdavanje znaka pristupačnosti nadležnom tijelu. Uz zahtjev se prilažu dvije fotografije dimenzija 30 x 35 mm i rješenje o postotku tjelesnog oštećenja, izdato od tijela koje je nadležno na osnovu relevantnih entitetskih propisa i propisa Brčko Distrikta Bosne i Hercegovine za utvrđivanje postotka tjelesnog oštećenja.

(3) Znak pristupačnosti ima rok važnosti 10 godina.

(4) Nadležno tijelo vodi upisnik o izdatim znakovima pristupačnosti i karton evidencije.

(5) Oblik i sadržaj upisnika o izdatim znakovima pristupačnosti i karton evidencije dati su u prilogu broj 1. i 2. ovog Pravilnika i čine njegov sastavni dio.

Član 7.

(Oblik, sadržaj i dimenzije znaka pristupačnosti)

(1) Znak pristupačnosti ima oblik pravougaonika, dimenzija 100 x 150 mm. Znak pristupačnosti ima prednju stranu i poledinu.

(2) Prednja strana znaka pristupačnosti plave je boje s ivicom bijele boje širine 3 mm i podijeljena je na dva dijela.

a) Na lijevom dijelu prednje strane znaka pristupačnosti određeno je mjesto u bijeloj boji namijenjeno za upisivanje:

1) naziva nadležnog tijela,

2) serijskog broja znaka,

3) roka važenja,

b) Na desnom dijelu prednje strane znaka pristupačnosti ucrtan je međunarodni simbol osobe s invaliditetom u bijeloj boji.

(3) Poledina znaka pristupačnosti podijeljena je na dva dijela:

a) na lijevom gornjem dijelu određeno je mjesto za fotografiju osobe sa invaliditetom, koja mora biti obilježena pečatom nadležnog tijela. Ispod fotografije je određeno mjesto za upisivanje, imena i prezimena, te potpisa osobe sa invaliditetom;

b) u desnom dijelu upisan je tekst "Znak pristupačnosti daje pravo na korištenje parkirnog mjesta rezerviranog za vozila kojima upravljaju osobe sa invaliditetom", na službenim jezicima u Bosni i Hercegovini i na engleskom jeziku.

(4) Znak pristupačnosti prikazan je na crtežu u prilogu broj 3. ovog Pravilnika, koji je njegov sastavni dio.

(5) Znak pristupačnosti izrađuje se od odgovarajućeg materijala koji mora imati određenu zaštitu, s mogućnosti plastificiranja nakon lijepljenja fotografije osobe sa invaliditetom u za to određeno mjesto na poledini znaka i upisivanja podataka propisanih ovim Pravilnikom.

(6) Znak pristupačnosti je jedinstven za cijelo područje Bosne i Hercegovine i ima zaštitni kod i broj.

Član 8.

(Način isticanja znaka pristupačnosti)

Znak pristupačnosti stavlja se ili privremeno lijepi u donji desni ugao prednjeg vjetrobranskog stakla vozila.

Član 9.

(Mjesto rezervirano za parkiranje)

- (1) Mjesto rezervirano za parkiranje vozila kojim upravljaju osobe sa invaliditetom mora imati na kolniku ucrtane rubne crte i biti označeno međunarodnim znakom invalida žute boje.
- (2) Parkiralište sa mjestima rezerviranim za parkiranje vozila kojim upravljaju osobe s invaliditetom, mora biti obilježeno, osim sa znakom parkirališta, i dopunskom pločom koja označava parkirno mjesto rezervirano za osobe s invaliditetom.

Član 10.

(Prijelazne i završne odredbe)

- (1) Svi znakovi pristupačnosti izdati prije stupanja na snagu ovog Pravilnika, prestaju važiti istekom roka od šest mjeseci od dana stupanja na snagu ovog Pravilnika.
- (2) Znak pristupačnosti, upisnik o izdatim znakovima pristupačnosti i karton evidencije osigurava Ministarstvo civilnih poslova.
- (3) Ovaj Pravilnik stupa na snagu osmog dana od dana objavljivanja u "Službenom glasniku BiH", a objavit će se i u službenim glasilima Federacije Bosne i Hercegovine, Republike Srpske i Brčko Distrikta Bosne i Hercegovine.


Broj 01-02-2-328-2/07
2. februara 2007. godine
Sarajevo

Ministar
dr. **Branko Dokić**, s. r.

Prilog 2: Oblik i sadržaj kartona evidencije

KARTON EVIDENCIJE IZDATIH "ZNAKOVA PRISTUPAČNOSTI"	
Slika	Ime _____ Prezime _____ Naziv _____ JMB _____ Datum i mjesto rod. _____ Državlj. _____
Ser. br. znaka _____ Datum izdavanja _____ Važi do _____ Važnost produžena do _____	Broj OI/LK _____ Izdana od _____ _____ JMB _____ _____ Reg. broj vozila _____ Marka _____ Tip _____
Potpis osobe/lica	Potpis ovlaštene osobe/lica
M.P.	
Promjene podataka upisuju se na poledini kartona.	

Prilog 3: Znak pristupačnosti - lice i naličje

Nadležno tijelo:	
Serijski broj:	
Rok važnosti do:	

Fotografija :	Znak pristupačnosti daje pravo na korištenje parkirnog mjesta rezerviranog za vozila kojima upravljaju osobe sa invaliditetom
Ime i prezime :	Znak pristupačnosti daje pravo na korištenje parkirnog mjesta rezerviranog za vozila kojima upravljaju osobe sa invaliditetom
Potpis :	Исказница даје право на кориштење паркирног мјеста резервисаног за возила којима управљају особе са инвалидитетом
	Parking Card is permitting the use of parking space reserved for vehicles operated by persons with disabilities